

SALMIRA

Murgnac

Gagliard Geli! Dumengia vargada ha l'Unìun purila sursilvana elìgiu in niev pursura. E quel para dad esser pulit curachus: Murgnac ha numnadamein intervegniu ch'el hagi dau l'intervesta a La Quotidiana senza salidar la giunta da sia suprastanza. Quei ei nuota schi tragic. Nua füss el pomai arrivaus sch'el havess dumandau il pareri da mintgin dil tozzel commembers e commembras da suprastanza?

Ils purs han pia in niev president. Zatgi sto denton occupar il post da *Geli Camenisch* ella suprastanza sursilvana. Murgnac ei surstaus che buc in dils producents da latg, buc in dils biopurs e gnanc in soli pur da vaccas-mumma ei staus promts da remplazzar il post. Murgnac ei digl avis ch'ìls purs dalla Foppa hagian nuota da basegns da nominar in representant.

La suprastanza communal da Medel ei sin buna via, respectiv il scenari da for-

mar quel. Quater strategias han il president communal ed il representant digl inspectorat cantunal presentau. Dil tschunavel scenari ha negin tratg flad. Co füss ei cun in augment dalla schurnada? Murgnac manegia ch'ins duess indemnisar meglier ils geraus ed ils funcziunaris, cun carnpiertg peglian ins las miurs. Ei füss da sperar ch'ìls Medelins emblidassen inagada lur senn per la spargnusadad.

Il temps che mintgin mondi sia atgna via, seigi vargaus. En caussa dils calendars seigi da semetter ensemen, ins stoppi nezegiar sinergias. Perquei vegn il «Calender per mintga gi» manizzaus fin e manedel ella sosa communal cun rg, sutsilvan, surmiran e sursilvan. Naturalmein, tut che spetga sin ina tala babilonia publicistica. *Giusep Capaul* ei daferton il sulet che defenda cun siu Calender Romontsch aunc la dretga posiziun. Cun gnanc in sulet sgreffel eis el mitschais dalla discussiun. El s'udess atgnamein era ella minestra.

Concurrenza da tamburs ad Andelfingen



Ils tamburs da Domat treneschan concentrai per gudignar la concurrenza ad Andelfingen. FOTO B. WITTMER

■ (gg) Questa fin d'jamna ha liug ad Andelfingen la 30avla concurrenza da tamburs giuvens dalla Svizra orientala. Rodund 40 Grischuns ein dalla partida. Tuts speran da gudignar il tschupi desiderau. La concurrenza ella categoria dil singuls ha gia liug la sonda. La dumengia sepresentan las secziuns avon il derschader. Duas secziuns dil Grischun vulan batter per ils emprems plazs dalla categoria pli aulta. *Christian Berther* meina ils tamburs da Mustér che han la da-

vosa ga contonschiu il tierz plaz. Ils 14 tamburs giuvens da Domat, menai d'*Andri Seglias*, ein motivai da puspei mussar ina fetg buna prestaziun e cuntinuar cul success d'antruras. Avon dus onns havan els piars il tetel da campiun dalla Svizra orientala, in tetel ch'els han saviu defender duront buca meins che 16 onns. Tier la concurrenza digl onn 1986 medemamein ad Andelfingen fuvan ils giuvens da Domat turnai a casa sco victurs.

Il niev chor da Danis-Tavanasa

■ (abc) Ils 8 da settember vegn ad ir ellas annalas dil vischinadi da Danis-Tavanasa: Questa sera allas siat s'entaupan ils commembers dils dus chors dil vitg da Danis-Tavanasa per decider l'aboliziun formala dallas uniuns. Il chor-baselgia s'entaupa ella ustria dalla Staziun, il chor mischedau ell'ustria Steila. In'ura pli tard ha liug ina tiarza sentupada. Allas 20.00 ha liug la radunonza da fundaziun dil Chor Uvriu Danis-Tavanasa. Commembras e commembers d'omisus chors s'entaupan comunablamein per instituir in niev capetel ella veta culturala dil vischinadi.

Emprem dirigent dil chor Uvriu Danis-Tavanasa vegn *Daniel Pally* ad esser. Sco la suprastanza puntuescha vegn la nova formaziun a dar peisa alternond ton al cant ecclesiastic sco al profan. Igl onn da cant 2006/2007 vegnan ins a sededicar oravontut al cant da baselgia. Emprema finamira eis ei d'embellir las fiastas e survetschs divins. Il chor Uvriu Danis-Tavanasa entscheiva cun in diember da 40 commembers. In concert annual vegn ei buc a dar sco punct culminont. Perencunter seprepara il chor per l'emprema presentaziun publica duront la fiasta districtuala da cant 2007 a Domat.

reclama

7 Milliarden für die AHV.

Der Gegenvorschlag zur KOSA-Initiative bringt der AHV 7 Milliarden auf sicher. Ohne Raubzug auf Kantone und Nationalbank.

KOSA
INITIATIVE:
NEIN!
24. September 2006

Nur bei einem Nein kommt der Gegenvorschlag von Bundesrat und Parlament zum Zug. Das heisst: 7 Milliarden für die AHV.
www.kosa-nein.ch



La gruppada dall'Unìun grischuna da castials avon ina part dil museum el casti da Hallwyl.

FOTO A. BEELI

Viseta tiels feudals ell'Argovia

L'Unìun grischuna da castials ha visitau treis edifecis da renum internaziunal

■ (abc) Ella quarta classa dalla scola primara fan ils scolars enconuschentscha cul temps medieval, cun castials, conts e castellans. A biars ei la historia dil mazzament dil retg Albrecht I. da Habsburg aunc en memoria. Dacuort ha l'Unìun grischuna da castials envidau ad in'excursiun ell'Argovia, el center oriund dalla dinastia. La famiglia dils de Habsburg ei presenta a bunamein finadin Svizzer. La historia dalla dinastia ei lu era colligiada stretg culla Svizra. Habsburg associesch'ins cun battagliais medievals, Sempach, Näfels, Stoons, Morgarten. Habsburg associesch'ins cuagl adversari, cuagl imperi austro-ungar, cull'imperatura Maria Theresia, cun Vienna, cun battagliais e conflicts per pussonza. La dinastia dils de Habsburg ha influenzau l'Europa. Rodund 40 commembers dall'Unìun grischuna da castials han dacuort visitau la cuntrada oriunda dils imperials. La ragischs schaijan bein egl Elsass, denton dall'Argovia anora ei la dinastia carschida

a sia muntada europea. A Königsfelden ha la gruppada giu caschun d'admirar in scazi artistic che la regina Agnes, feglia dil retg assassinau Albrecht I. da Habsburg, ha schau far. Las finiastras picturadas ein realisadas els onns denter 1320 e 1360 e s'audan denter las pli custeivlas dall'Europa. La vitraglia muossa figuras e scenas biblicas dil Niev Testament, Cristus, Maria, ils apostels, sogn Francedstg e Clara d'Assisi.

Il casti dils niebels da Habsburg schai rodund in quart'ura naven da Königsfelden. Da quei «igniv» anora, situaus sin ina collina datier digl Giura, fuva il retg cavaldraus encunter a ses assassins. Sur il liug dil drama ha la vieua, regina Elisabeth, schau baghegiar ina baselgia. Duront plirs tschenteners ha la dinastia lu satrau ils confamiliars ella cripta da Königsfelden.

Ils mirs pli vegls dalla Habsburg han ins scuvretg per els onns tschunconta. Quels dateschan dall'epoca entuorn 1050. La scuvretga ha dau ina vesta diffe-

renziada alla historia dalla famiglia. Sco il president dall'Unìun grischuna da castials, il historiograf *Jürg Muraro*, ha declearau, han ils construiders dall'emprema Habsburg duvrau la crappa dil camp militar dils Romans a Vindonissa sco material da baghegiar. Igl onn 1815, cu l'Argovia habsburghesa ei entrada ella confederaziun, ei il casti daventaus proprietad cantunala. La part architectonica pli giuvna datescha dils onns entuorn 1500. Leu sesanfla oz in enconuschent menaschi d'ustria.

Sco tiarza etappa han ils Grischuns visitau il casti dall'aua Hallwyl. Quei complex medieval sisum il lag da Hallwyl el Seetal s'auda medemamein tiels objects impurtonts dil patrimoni culturhistoric dall'Argovia. Dapi 1994, cu il cantun ha surpriu la proprietad dalla fundaziun da famiglia dils de Hallwyl, ha el investau rodund 14 milliuns francs en in menaschi da museum fetg attractiv per carschi ed affons.

Las «miurs» muossan lur reginavel

La Canorta d'affons pigns a Glion ei sepresentada

■ (gg) Ier ha la canorta d'affons «Mäuseburg» a Glion aviert sias portas e presentau il reginavel dils pignets. La purchida possibilitescha a dunnas da luvrar parzialmein e surdar igl affon pign per mezs ni entirs dis all'instituziun. Cun susteniment da plirs sponsurs ed ils purtaders principals, Banca Raiffeisen Surselva, Spital regional Surselva e Regiun Surselva, Glion, ha l'inizianta, *Claudia Schüller*, realisau l'emprema canorta d'affons ella regiun. Ella vul promover ils aspects socials, emoziunals, linguistics e mentalis dils affons. Sin fundament dalla experientschas culla canorta a Glion duei vegnir elavurau e realisau in concept per tgira professiunala d'affons pigns en Surselva. Loghens che vegnessen en damonda per ulteriuras canortas ein Laax e Mustér.

Grazia alla realisaziun dil «casti da miurs», la «Mäuseburg», ston dunnas buca pli sedecider denter affons e professiun. Cun structuradas socialas adattadas san ellas cumbinar fetg bein affons e professiun. Ina squadra da tschun persunas meina la canorta, numnadamein la menadra, *Claudia Schüller*, la pedagoga sociala diplomada, *Wieke Van Vliet*, in'educatura d'affons pigns e duas praticantas. La gruppa meina ina canorta tenor novas ideas e criteris professiunals ed economics. Ils af-



Ils affons pigns termaglian el garter dil «casti da miurs».

fons han la pussevildad da termagliar, far gimnastica, zambergiar, tedlar praulas e musica, mo era da ruassar e durmir. Mintga stanza cun differentas colurs ei endrizada optimalmein per sias funcziuns. El garter san ils pops giugar cun balluns, plumatschs, cuorer entuorn ni emprendre d'ir a pei cun agid d'in indrez vid la preit.

Ella stanza da gimnastica san els sdavalar. Ella stanza da durmir ha mintg'affon sia atgna matraza per far siesta. Il bogh cun tuttas installaziuns ei fatgs per affons pigns aschia che mintgin sa far tut sez. El grond curtgin san ils affons termagliar, far ballabeina, ir ella sablunera e guder l'aria frestga.